

古丰识略



古豐識畧卷九

分巡歸綏等處兵備道長白鍾秀石帆

初稿

原 揀 選 知 縣 崞 縣 張 曾 小 袁

地部

陵墓

燕丹墓 在口外榆林城相傳即太子丹也史記荆
刺秦王不克秦遂擊破燕代兵進圍薊拔之燕
王走遼東斬太子丹以獻於秦越二年秦王賁滅
燕還滅代此地代北或師旋葬此如韓侯嶺葬
淮陰首亦未可知或曰此慕容燕太子也



青冢 在歸化城南二十里高五六丈土色黝黑望
之如此墓側有石馬一石幢一殘缺不全石碑三
俱近代立遼史地理志豐州有青冢即王昭君墓
漢書昭君名嬭南郡婁歸人元帝時以良家子選
入掖庭數歲不得見御積悲怨會匈奴呼韓邪來
朝帝初以宮女五人賜之昭君乃請掖庭令求行
呼韓邪臨辭大會帝召五女以示之昭君豐容靚
飾光明漢宮顧影徘徊竦動左右帝見大驚意欲
留之而難於失信遂與匈奴號寘胡閼氏生一男
伊屠智牙師為右日逐王後被異母兄囊知牙師

烏珠留若鞮單于忌殺呼韓邪立二十八年建始
二年死其前大閼氏子雕陶莫皋立為復株索若
鞮單于欲妻之昭君上書求歸成帝勅令從胡俗
遂復為後單于閼氏生二女長女云為須卜居次
小女為當于居次須卜當于匈奴大族居次猶漢
言公主也至平帝時王莽秉政欲悅王太后乃諷
單于令遣昭君女須卜居次云入侍太后喜賞賜
甚厚迺歷來詩曲俱主西京雜記毛延壽畫圖及
昭君不願從胡俗飲藥而死之說至杜工部荆門
懷古詩則又以為荆門州人而結句所云千載琵琶

琵琶作胡語亦因石崇王明君辭序而附會之非昭
君當日果抱琵琶出塞也傳元琵琶賦序已詳言
之且載在宋書樂志其說最為明確昭君改稱明
君明妃則晉人避司馬昭之諱媻元帝紀作媻
匈奴傳作媻惟後漢書南匈奴傳始作媻錢竹汀
曰說文無媻字左傳妃媻嬪御唐石經本作媻則
匈奴傳媻字不誤而元帝紀作媻恐誤媻字說文
亦未收也府志謂毛延壽畫圖及不從胡俗飲藥
而死之說未詳何據殊久考斯惟言青冢有三瓦
剝地方及黃河西岸復有二處未知孰是

北魏金陵 在古盛樂城西北永興二年葬道武於
盛樂金陵其後元明太武文成獻文四帝皆葬于
此未詳其地

按清水河西南鄉有村曰大王墓二王墓二
王墓各距署三五十里亦未詳為某王

焦贊墓 在吳公壩口內正史未見其名小說家樂
道之謂與孟良同隸楊延昭麾下北邊古蹟如此
類者頗多真贋不足辨也

班都統墓 在大黑河村南里許有屋三楹內三冢
如瓶塔形高三四尺外十餘小冢高不盈尺石碑

二其一係蒙古書其一乃滿漢書諭祭文也旁有小碑字多剝蝕文義亦不可解

按府志謂都統世襲精奇尼哈番墓在口外黑河南岸即土默特台吉朝庫兒有

御製碑詢之土人初無知者後聞大黑河南有丹府墳墓一所意當為都統丹津葬地及就視之乃諭祭右翼都統班達爾什者與左翼都統丹津無涉傳聞之不可信如此

烈女墳 在城西南三里漏澤園側有小石坊為烈女尚氏立

按古人有言生寄也死歸也至骨肉復歸於土而生人之事畢死者之名姓亦與之俱盡矣乃越千百年後過其地者若復愛之護之憑之吊之相與流連而不忍去其故何哉豐州古中外戰爭地其間水火鋒刃風塵埋沒固不啻恒河沙數至一二忠魂義魄豈無人焉為之收碧血而葬衣冠耶況自秦漢以來割據不一外番君臣與中國爭強咸豈生前赫赫而死後泯泯竟不得一杯之土為後人所瞻望而指數耶何有幸有不幸耶考史策所紀如北魏諸陵既不過

僅存其名惟明妃一冢靈光歸然而歷年來野
火春風已無復青青之色其餘更不堪問矣爰
取近代有名可指者附識於後亦冀其無速朽
云

古豐識畧卷十

分巡歸綏等處兵備道長白鍾秀石帆

初稿

原 揀 選 知 縣 崞 縣 張 曾 小 袁

地部

關津

殺虎口 為鄂爾多斯貢道塞北之咽喉也明自正
統以後南北畫此為界虎字戎

朝所改與破虎殘虎威虎敗虎阻虎等堡同又黑山
一名殺虎山與此口別口距城二百四十里

大紅山口 城東北七十里見府志今無其名惟城

東北六十里有卯獨沁溝通四子部落旗疑即其地

小紅山口 城東北三十里見府志今名紅沙口距城二十里迤東有哈喇沁溝討連疏溝奎樹溝俱通大青山後

吳公壩口 城西北三十里通山後瓦剌等處即古
桐陽塞也通志城北有翁公谷疑即此轉音之訛
刺麻灣 城西南一百九十里屬托克托城

黃河渡 在刺麻灣東西岸有渡船鄂爾多斯以西
商民負販鹽米俱在此渡河未知即古君子津否

洪津橋 城西南四十里有永濟柵或謂此古君子津也

烏素圖溝 城西北二十里通志以溝為谷迤西為胡塞溝距城三十里即古高闕塞入溝為鑲藍旗糧地俱通漠北路

水磨溝 距城七十里距畢齊克齊十里亦通漠北黑牛溝口 距城八十里在畢齊克齊西通伊犁路萬家溝口 在黑牛溝口西四十里

湖灘河朔渡口 在城西南一百八十里托克托城南有渡口船隻通志謂即君子津亦疑似之說

毛代渡口

在湖灘河朔西北距城二百四十里

大溝門

在和林格爾東北八十里與寧遠接壤

按關津之設地方之防守繫焉平昔每至一方

必詢悉其道路之出入山川之阨要某處距某

處若干里為通衢為僻徑某處過事宜守禦某

處宜斷塞境內口隘凡若干所繪為圖本藏諸


行笥以備不虞見者輒誦其無病而呻曾未敢

一置喙也漠南地數千里雁門一關為古今南

北要塞近則以車馬輻湊王道蕩平殺虎口為

西北椎稅總區然以之譏行旅有餘以之資堵

防不足豐州毗連各外藩中外藩蔽以大青山
為牆垣門戶之存廣輿記所云晉大積薪其慮
至深且遠雖當此南北一家之會似無庸過為
區畫而地險所設正未可以無用視之今取通
漠北往來諸路畧識數端俟後再為續入觀者
幸知其用意之所在云



古豐識畧卷十一

分巡歸綏等處兵備道長白鍾秀石帆

初稿

原 棟 選 知 縣 崞 縣 張 曾 小 袁

地部

城郭

歸化城 明萬曆十四年忠順夫人三娘子所築唐

婁師德所築豐州城故址也周三里許高三丈餘

舊南北兩門年久坍塌經土默特兩旗與六招刺

麻台吉等三佐領下人於舊城南增設外城包東

西南三面築牆置門東曰承恩西曰柔遠南曰歸

化北曰建威俱建樓其上以舊南門為鼓樓顏曰
威固康熙三十年工竣報部乾隆元年重修國語
名曰胡胡河通乾隆六十年改為庫克河通

綏遠城 雍正十三年新築乾隆二年工竣周圍九
里餘高二丈九尺五寸門四東曰得樹南曰仰日
西曰控河北曰吞山門各有樓東近旭南承薰西
阜安北鎮寧角樓四

托克托城 即脫脫城明嘉靖中俺答義子恰台吉
名脫脫住牧此城故名周圍約十里許今城垣頽
廢不全俗傳舊本磚城後移其磚包朔平府城土

垣日漸傾圮此語無所考疑即明正統中以邊外
玉林衛城內徙為右玉林衛之訛

按城郭之制所以捍外侮也淮南子謂城始於
鯀春秋城成必書義舉重矣雖孟子言城郭不
完非國之災然以三里七里環攻不勝非恃此
增障浚隍之力而何口外古北番地視水草為
游牧遷徙不常無城郭之固秦漢以後建置不
一今既五廳分列自應捍我牧圉迺除綏遠城
駐防而外三廳俱無城托克托土城雖存難資
保障歸化城惟都護一官尚在城內其餘公署

倉廩監獄市廛俱在城外雖復時啟閉謹封納
北門鎖鑰實於地方無裨稍有不測將堅壁清
野之謂何矣哉

太宗文皇帝親征察哈爾諭土默特左右翼都統謂
爾等所守城小濠狹勢難禦侮宜於城外建築
層垣以資捍衛工竣之日內城外垣嚴加防守
敵自不敢窺伺煌煌天語所以綢繆未雨而思
患豫防者豈獨為歸化一城而言凡在邊陲所
應恪遵今塞外幸當無事之日固不當眾志成
城然而攘竊穿窬獄囚逃越烏得謂非城郭不

完之故乾隆初各省督撫奉部議令民自行修
城爾時想寥寥邊氓子來無力今則閭閻撲地
雞犬相聞車馬一統之盛振古未有守土者當
何以期永固耶願以質諸後來者

古豐識畧卷十二

分巡歸綏等處兵備道長白鍾秀石帆

初稿

原 棟 選 知 縣 崞 縣 張 曾 小 袁

地部

壇廟

先農壇 在城東二里許雍正五年都統丹津奏立

壇基東西濶十五丈南北長三十丈中為壇有正

殿三間東殿三間東西奏樂房各一間大門一間

孔子廟 宋 熙七年蕃漢都指揮王承美破契丹

兵於豐州追至青冢百餘里擒其天德軍節度使

韋太以獻明年復擊敗之於豐州置孔子廟見宋
史今

文廟係

國朝雍正五年都統丹津等奏立在城南門外二里
許路西正殿三間東西廡各三間後殿三間後殿
東為井亭西為祭器庫正殿前泮宮門三間東西
兩小角門角門東名宦祠三間角門西鄉賢祠三
間門外有橋一下為泮池東西齋房各一間櫺星
門三間東西兩小角門外東西兩轅門與南照壁
相連正殿祀至聖暨配哲位東西廡先賢先儒位

後殿為崇聖祠每歲春秋仲月上丁本城副都統率官致祭乾隆三十九年道光四年重修

按碑記初歸化城商民卜地庀材為都統丹津建立生祠經都統再三辭却而材木俱已備齊勢難中止乃與尚書通智奏請改建文

廟嗣後重修經費俱奏用土默特庫貯正項漢壽亭侯廟 府志有二一在小東街一在茶房今

小東街廟內添祀大神馬神金龍大王酒仙觀音茶房分東西南北俱祀關帝西茶房添祀三官孫

贖

靴工所祀

南茶房添祀釋迦佛瘟神老君

金銀錫鐵各壇工所

祀魯般吳道子羅真人

雜髮工所祀

軒轅黃帝

縫工所祀北

茶房先於東西廊添祀財神及馬牛羊三神後於東偏專祀財神又東祀馬牛羊三神皆商賈百工藝事報賽之所香火極盛惟東茶房頗形寥闊因就近有梨園子弟祀唐三郎即元倡妓祀盜跖故也

玉皇閣

在城外西南今前殿添祀三官東三皇附

歷代名醫西金華聖母過殿祀靈官子孫聖母餘祀真武雷神火神馬神及觀音大士

三賢廟

即三義廟在南大街東小巷內今添祀觀

音孫真人井神倉神

按三義廟以漢昭烈帝關張並祀識者已議其無君臣之禮今日三賢史失歷代褒崇之義矣宜改正之

財神廟 在無量寺前東小巷今北茶房廟十王廟俱有之

十王廟 府志在城外西街今名小北街廟在西小巷內祀地藏王菩薩及十殿閻羅王東二殿祀火神財神子孫聖母

三官廟 在隆壽寺東北前殿亦祀關帝迤西為魯

般廟又西為子孫聖母廟再西為邊寧寺祀觀世
音過殿祀真武關帝及馬神其地即名三官廟街
龍王廟 有二在海崖北者曰南龍王廟內附祀風

雲雷雨八蜡馬神都侯所書吏祀蔡倫紙工所祀眼光菩薩

廟前有文昌閣奎星閣在西茶房北者曰西龍王
廟距同知署二里許雍正中建中祀龍神東祀八
蜡西祀風神廟西北有村即以廟名多忻州人

東嶽廟 在城南滹澤園側廟前為城隍行宮每歲
清明中元十月朔為祭厲所前有小廟祀孤魂

城隍廟 在城北門外雍正中建

費公祠 在財神廟西康熙中商民為將軍費襄壯
公建立生祠公歿即塑像其中東西塑丹都統津
齊觀察布森像道光十二年大學士松公筠奉使
來城勘定各藩游牧界址居民繪像附祀於此

按我

朝大清會典所載於社稷先農先師天神地祇嶽鎮
海瀆名山大川俱有直省常祀儀適周禮春官
小宗伯禱祠於上下神祇史記封禪十時郊上
帝諸神祠皆聚洪範八政三曰祀禮制祭祀法
施於民以死勤事以勞定國能禦大菑捍大患

凡有功德於民者皆祀之典葦重也各府州縣
志乘俱首重學校以文廟為道統所垂與學並
建而名宦鄉賢忠義節孝及文昌魁皇諸祠因
類相附其餘風雲雷雨山川社稷城隍祀典我
及祈報在焉我

朝從明代舊制設近郊三壇并崇祀關帝及諸神祠
宇有靈異者亦聽民祈禱弗禁以故農祀龍神
牧祀馬神祈嗣者祀子孫聖母驅疫者祀瘟神
至百工技藝亦各祀其創始之人以為崇德報
功祈福之舉而神祠香火幾徧天下非鬼之祭

在所不免矣歸化城惟雍正初設立先農壇於東郊社稷山川俱未之及祀典之闕也殊甚至文廟為土默特蒙古專建兩無從祀諸賢每多遺漏名宦數粟主亦未經奏請率以長生祿位增入鄉賢則僅存一祠無所崇奉以故學校一門未能專立僅以先師冠各廟之首而以諸神祠附焉其甕城小祠與巷曲五道神井竈各廟以及鄉村諸祠宇並四廳分置新建者不與則見聞所及實未能周非故從詳畧云

古豐識畧卷十三

分巡歸綏等處兵備道長白鍾秀石帆

初稿

原 棟 選 知 縣 崞 縣 張 曾 小 袁

地部

寺塔

無量寺 俗名大招在城南門外里許我

朝崇德中

明崇禎中

都統古祿格楚琥爾奉

諭將舊寺

委左翼左領補音圖驍騎校喇巴太與德木齊溫

布刺麻協同新修展大奏一賜今名寺內供

皇帝萬歲牌位康熙三十六年經札薩克達刺麻訥

依齊托音呼圖克圖呈請具奏殿易黃瓦

延壽寺

俗名西呼圖招今訛為舍利圖招在無量

寺東百餘步康熙三十五年

聖祖仁皇帝西征駐蹕值西呼圖呼圖克圖將舊寺

新修工竣奏

賜今名

御製碑文清漢蒙古西

番四體書分立寺前左右

賜刺麻唐古忒藏經

一部藥王經一部珊瑚數珠一盤紅硃寶石雍正

四年 賜數珠一盤內西呼圖呼圖克圖居住嘉

慶二十三年十二月經部具奏以西呼圖呼圖克

圖補授札薩克達刺麻掌印所有一切報部案件

停止徑行咨報呈綏遠城將軍轉咨理藩院咸豐九年重修有藏經塔

按通志延壽寺在城西北二十五里康熙二十九年改今名府志以延壽為延福一名舍利圖招

崇福寺

俗名小招在延壽寺東百餘步康熙三十

六年訥依齊托音呼圖克圖新建寺前有藏經塔聖祖仁皇帝西征凱旋駐蹕於此奏賜今名有

御製碑文與延壽寺同賜刺麻大紅羽緞褂一領

黃蟒緞袍褂二領涼冠二頂珊瑚數珠一盤後又

賜藏經一部藥王經一部金字數珠一盤黃絲帶
一條帶扣荷包飄帶水晶靴小刀火鐮俱全金錢
一刻壽比南山長命富貴銀錢一刻吉祥如意
御筆金書心經寶塔一軸康熙庚寅三月十八日
沐手敬書寺內訥依齊托音呼圖克圖居住

崇壽寺

俗名朋蘇招一名西招在城西門外河西

距城二里餘順治十八年喇麻錫拉布建康熙中
其徒札薩克達喇麻朋蘇克添修三十三年奏
賜今名內設呼畢勒罕一名地勢初極宏敞殿宇
亦甚壯麗後為河水侵占寺門北移院塔今在城

外

按府志蓬松招即朋蘇之誤俗傳費將軍誅活佛即在此寺又云數年前西藏有呼畢勒罕出世遣人來寺取塔內藏經寺眾初未之信及啟視果有之且言此佛被誅後已轉生數世頸瘡未合俟合時當仍來城亦無稽之說也

隆壽寺

俗名額木氣招在城西南里許康熙八年

綽爾濟達賴建三十四年續修奏賜名嘉慶

十年被火重修有藏經塔一

宏慶寺

一名拉布齊招今呼為宏慶招在城南文

廟官學西百餘步康熙六年寧寧呼圖克圖建奏
賜今名以上六寺俱額設札薩克刺麻一名達刺
麻一名巷有觀音寺

延禧寺

俗名綽爾濟招在延壽寺東南里許係西

呼圖徒弟達爾漢綽爾濟刺麻建奏

賜今名與

延壽寺互諷

萬壽經內拉布札木巴達爾漢呼

圖克圖居住額設達刺麻一名

慈燈寺

在崇福寺東南里許內有塔為慈燈塔基

圍十丈上小塔五土人即呼為五塔寺雍正五年

崇福寺刺麻彥察爾清呼畢勒罕授副札薩克達
刺麻呈請建立十年奏 賜今名額設達刺麻一
名

甯祺寺 一名太平招在城西北里許康熙六十一
年土默特兩翼官兵等建乾隆十九年寺東北增
建納木札勒極勝塔二十年寺西北增建仁義極
忠塔四十九年奏 賜今名額設達刺麻一名

廣福寺 在崇福寺前路西土默特已故參領札布
之妻建立後施與章嘉呼圖克圖乾隆三十年奏
賜今名額設達刺麻一名

隆福寺

一名迦藍招在崇福寺東北地名馬蘭灘

寺基狹小無建置年月可考現屬隆壽寺管理

廣壽寺

在城西北烏素圖溝內山陽土人即呼為

烏素圖招康熙中親綽爾濟刺麻阿旺丹丕勒勤

勞王事蒙 恩賞給銀兩即以其銀建寺奏 賜

今名有 御賜匾額奉 旨設立字樣屬延壽寺

管理

永安寺

舊在城北烏蘭察布地亦西呼圖呼圖克

圖所建後因寺基逼近公主府蒙府助給銀一萬

兩移建烏素圖東溝內察漢哈達山陽距城二十

五里土人呼為察漢哈達招

慶緣寺 在城西北山陽距城二十里明萬曆中建

我

朝乾隆四十七年重修四十八年呈請報部轉奏蒙
賜今名額設達刺麻一名

法禧寺 在慶緣寺東北係寺屬醫生綽爾濟羅布

桑旺札勒建乾隆五十年奏 賜今名

增福寺 在梨樹村康熙三十五年慶緣寺所屬徒

弟格隆巴雅斯琿朗建立距城一百三十餘里

慈蔭寺 在果必托利補拉克地方距城百餘里雍

正十年建乾隆二十七年遵照部咨每歲由土默特旗遣往達刺麻一名徒弟六名念經刺麻二十名按月給發銀米

慈壽寺 在城西山陽距城六十里順治中察漢迪彥齊呼圖克圖建康熙中奏 賜今名額設達刺

麻

崇禧寺 在城東北鄂奇特溝內距城六十里順治中額爾德尼迪彥齊呼圖克圖建康熙五十二年奏 賜今名額設達刺麻道光十八年被火焚幾

燼

廣化寺 在西山溝內距慈壽寺二十里舊為成平

廣寺康熙五十八年移建於此乾隆四十八年增

修奏 賜今名額設達刺麻

普會寺 在城北山後沙拉木楞地西呼圖呼圖克

圖建奏 賜今名距城一百二十里

普安寺 在城東察哈爾旗岱山海地乾隆三十八年

彥察爾濟呼畢勒罕建立奏 賜今名土人即呼

為岱海招距城二百餘里

尊勝寺 在城東北哈拉沁溝源吉爾噶朗圖山康

熙元年咱雅班第達呼圖克圖由哈爾喀札薩克

圖汗旗下帶來徒眾百餘奉 旨在歸化城居住
建立新寺奏 賜今名距城百餘里內設札薩克
刺麻一名俗呼為班第達招

善緣寺 在城東南登奴素山建置年月無考額設
呼畢勒罕一名達刺麻一名屬崇福寺管理

靈照寺 在城西二百餘里明順義王孫大成台吉
之妻瑪沁建大門石刻如來佛寺額設達刺麻一
名

按明史大成台吉之妻為大成比技瑪沁或
其名也

福慧寺 在城西山陽胡寨村建置無考額設達刺

麻一名

永福寺

廣法寺 俱在城西北九十餘里阿魯板升山溝內
係干珠爾巴諾門漢呼畢勒罕建立額設管理二
寺達刺麻一名

吉特庫招 在城西吉特庫山陽距城二百餘里康
熙三十六年札薩克達刺麻朋蘇克建未請寺名
額設達刺麻一名

都貴招 在托克托城東南內設呼畢勒罕一名達

刺麻一名屬章嘉呼圖克圖管理

廣覺寺 在薩拉齊西烏拉特東公旗界五當溝內
距城三百四十里對音克哩班第達呼圖克圖居
住寺內刺麻約五百餘名嘉慶四年奉理藩院來
文令綏遠城將軍管理每年春秋二季派官前往
查核刺麻數目咨報理藩院查照三年將軍親往
巡查一次

東白塔 距城五十餘里

西白塔 即郭公塔距城八十里以上兩塔俱詳古

蹟

按刺麻之稱卽華言無上也刺麻所供佛寺向
名曰招或取招提之義口外各招可指名者三
十額設呼畢勒罕札薩克刺麻達刺麻二十呼
圖克圖十其呼畢勒罕卽華言化身死而不失
其通自知所往生地常在輪迴本性不昧之義
札薩克者理事之稱呼圖克圖亦理事之大僧
官也各寺所住刺麻稱呼如托音卽刺麻弟子
通稱西呼圖卽蒙古稱坐牀刺麻章嘉呼圖克
圖刺麻之受褒封者如札薩克蒙古所奉之呼
圖克圖其呼畢勒罕將出世報明理藩院與住

京之章嘉呼圖克圖掣之如掌印者然格隆成
僧也一作噶隆又有噶布倫統理兵馬刑名係
請旨補用額爾德尼亦班禪之尊號向例達賴
圓寂以班禪或兩呼圖克圖及諾門罕代理呼
圖克圖較尊諾門罕次之其來城之始詳見人
部呼圖克圖一門易曰聖人以神道設教我
朝自開國伊始即以佛教馴服外番迨後西藏撫綏
益藉以化誘獷俗馭夷之道必因其習信夫

古豐識畧卷十四

分巡歸綏等處兵備道長白鍾秀石帆

初稿

原 棟 選 知 縣 崞 縣 張 曾 小 袁

地部

公署

綏遠城將軍衙署 一所乾隆初建共房一百八十

三間在鐘樓西北其餘除屢次裁汰外現存左右

兩司衙署二所各房十七間協領衙署五所各房

三十八間佐領衙署十八所內奉文撥給世職官

三所留十五所各房二十四間防禦衙署二十五

所內奉文撥給世襲雲騎尉五所留二十所各房
十九間驍騎尉衙署二十二所內撥給世職恩騎
尉二所留二十所筆帖式衙署三所各十四間

歸化城副都統衙署 在城北門內路西自裁汰兩

都統三副都統將各衙署變價歸款報部後乾隆

二十七年准工部來咨遷移補修道光二年重修

四年改建大門五年添立東西轅門其戶司兵司

仍占舊都統署在城北門內路東大堂五間東為

銀庫西為軍器庫東西兩司辦事房各五間後樓

房三間餘印房前鋒營房書吏房十八間道光四


年將向西大門遷移向南外操演營署一所稽察
廳署一所參領與佐領署十二所佐領署四十八
所驍騎校署六十所

歸綏道衙署 在歸化城外里許河北乾隆初新建
三十七年四十五年嘉慶十八年屢次補修咸豐
四年大雨房屋坍塌毀幾盡五年經本道鍾秀任內
重修共署西一在綏遠城將軍署東南通判署四
所一在林格爾距道署一百二十里一在薩拉
齊距道署一百四十里一在清水河距道署二百
六十里一在托克托城距道署一百八十里歸化

廳屬巡檢署二所一在道署東一在畢齊克齊距
廳七十里綏遠廳屬盈寧庫大使管豐裕倉大使
署一所在廳署南和林格爾屬巡檢署一所薩拉
齊屬巡檢署二所一在本廳一在包頭鎮距廳一
百里清水河屬托克托城屬巡檢署各一所

按公署之設南面而臨嚮明而治所以崇體制
壯觀瞻也其廣狹大小固視乎官秩之尊卑亦
因乎地勢之難易口外除將軍以下官屬公署
俱在綏遠城而外推副都統署在舊城綏遠同
知及倉庫使署在新城其餘俱在城外歸化同

知一署建立較早其餘次第興修歸化巡檢署
舊傳為公主府別業餘皆無從稽考土默特參
領佐領驍騎校等署布滿街衢公署私宅幾不
可辨塞外風高土薄房屋最易傾圮即以監司
一署而言自乾隆初迄今百二十餘年補修業
經四次此番修葺幾與創造者同昔叔孫昭子
所到雖一日必葺其牆屋非故求美觀也公署
而以傳舍視之則無事不存五日京兆之想恐
於民生國計久安長治之道必有所怠弛者矣
整齊部署無廢乃心實與名符當共慎之



古豐識畧卷十五

分巡歸綏等處兵備道長白鍾秀石帆

初稿

原揀選知縣崞縣張曾小袁

地部

官學

綏遠城官學 在將軍署有空散房十五間為八旗

滿蒙子弟肄業處凡興校庠序塾五學鑲黃正白

二旗入興學正黃正紅二旗入校學鑲白正藍二

旗入庠學鑲紅鑲藍二旗入序學兩翼蒙古入塾

學每學二旗官學生四十名乾隆五十年前任將

軍吉福奏准裁汰於原設五學外添設滿漢繙譯學一所各旗每佐領下挑選閒散幼丁年十五以上二十以下能習國書及漢書者各十名入學其繙譯教習由部題請將軍副都統率同本城協領佐領防禦驍騎校筆帖式等官監場考取二員入學三年期滿如果行走勤慎教導有成將軍等出具教導有方考語保題以驍騎校用五學教習每學二人由八旗領催前鋒馬甲內挑取各學公費銀兩六學一體承領由繙譯學主稿五學出領咨春冬兩季每學各領公費銀一十三兩五錢夏秋

兩季每學各領公費銀八兩四錢一分每年四季
各學各領銀四十三兩八錢二分由房租銀內給
發

按綏遠城取租鋪面房除變價空閒外現存
房一千一百六十餘間每月約收銀三百五
十餘兩自乾隆六十年起徵收拆毀房間空
閒地基菜園租銀每年約收銀二百餘兩官
學公費即由此出

土默特官學 在文廟西偏正房三間為講堂東西
房各三間為學生肄業地再西為箭亭雍正十三

年經尚書通智等奏定由六十佐領每佐領下撥
送英俊孩童二名由佐領以下官員內選派教習
四員每教習月給飯錢一千二百文每學生日給
飯錢十六文每月初十日由銀庫散給

銀庫款項見倉庫門

按我

朝以八旗重兵分駐各要地揆文奮武所在皆然自
乾隆初始以右衛駐防移駐綏遠城設戈講藝
息馬論道文學之士爭自濯磨俊乂徧於膠庠
棠征登夫皇路科第甲乙蔚然炳然泉道光中

年始停止駐防鄉會試非重武功而輕文德也
國家自入關以來以騎射為先務帖括章句原藉以
為取士之方八旗子弟進身之始不專賴此至
國書釐定頒示不容有銖黍之差科斗蟲魚備
存古法乃近今旗員起家科甲者問十二字頭
不知而斤斤焉致力於八股舍志正體直弗講
而沾沾焉從事於時墨舍本逐末日甚一日浸
失我

聖祖命宿衛重臣率虎賁三千彈壓嚴疆之初意矣
然而科舉雖廢絃誦宜存學一日則收一日之

功讀一書可得一書之效道德仁義非為科目
設也禮樂書數可與射御兼也自茲以往雖不
必風箏寸晷與文士絮短較長而講習之餘實
有以陶氣質明彝倫焉學顧可稍忽乎哉若土
默特官學之設雖專用蒙古文字而清文鑑三
合切音一書頒行已百餘年蒙古之讀漢書延
漢師者比比皆是間嘗入其學亦彬彬然禮法
之存聲教所訖薰陶而涵育之其丕變可立覩
也

古豐識畧卷十六

分巡歸綏等處兵備道長白鍾秀石帆

初稿

原揀選知縣崞縣張曾小袁

地部

義學

古豐義學 創始無所考嘉慶八年長白德綸以吏

部郎中簡任歸綏道念義學廢弛日久乃自捐廉

俸於道署西北隅重建房屋一所中楹奉至聖先

師神位東西各五楹為生徒肄業地時歸化城理

事同知西理訥綏遠城同知塔清阿和林格爾通

判繼昌薩拉齊通判札勒罕清水河通判伊克坦
布托克托城通判善寶綏遠庫大使周大鼎歸化
巡檢葛瀛三薩拉齊巡檢程天麟等亦各輸廉俸
共襄厥成因於九年春延師主講考取生徒三十
人入館受業立定條規每歲延兩師主講席月各
奉脩脯銀十兩學徒茶水每月銀三兩考課獎賞
每季銀八九兩不等有督學陳方伯張及盈寧庫
大使周大鼎碑記可考

陳記載
藝文部

德公又以需用頗

多恐難經久因具稟巡撫伯公議定歸廳歲捐銀
五十兩綏和薩清托五廳歲各捐銀三十兩歸薩

兩巡檢歲各捐銀十兩其餘不敷銀兩由歸綏道
自行捐足毫不派累商民並將條約碑文刊發各
廳其歲捐銀兩定期五月節前解清以備支給十
七年六月德公陞授長蘆鹽運使將卸道篆復稟
請署撫衛公札飭道屬查照原立章程永行遵辦
經布政司陳公遵批移咨後任歸綏道崇轉飭各
廳存案交代是年十一月間嵩公因義學房屋坍塌
不堪棲止將館移住范家號其條約仍遵前議
造冊備查計開各廳同知通判巡檢共捐銀二百
二十兩義學兩師脩脯及生徒茶水每月用銀二

十三兩每節學師節禮銀八兩每年三節用銀二十四兩以上約共用銀三百兩除捐銀外由本道補足每年二八月致祭先師孔子祭品豬羊等項俱本道備辦道光元年歸綏道岳扎包頭鎮巡檢知悉照得歸化城義學經費向除清水河等處巡檢缺分瘠苦無力捐輸外在於六廳并歸薩二巡檢中分別攤捐維時包頭鎮巡檢尚未設立是以未經議捐今該巡檢設已多年自應一體攤捐查薩拉齊巡檢每年應捐銀十兩自道光二年為始將此項分開各捐銀五兩札到即便遵照毋違特

札道光二十五年十月歸化城錢行總領偕散戶
等四十九家捐錢一千緡為義學膏火之需經護
理歸綏道潞安府知府多慧籌議以義學賃房居
住究非長策即將錢一千緡易銀四百兩價典本
城西門外楊家巷西頭路北房院一所係李毓嵩
所接益盛永原典蒙古干招架爾房屋計開正房
三間有抱厦東廚房三間西廂房七間挨井東南
房三間西南房四間大門一間內西套房三間原
典主自占如蒙古原地主及原典主備價回贖即
稟明歸綏道飭歸化廳驗收銀兩另行典買房院

典約存案并行歸化廳

附德公告示為曉諭事竊以文明之治不擇地而興蒙養之方可因材而篤本道莅任茲土所見閭閻闕或以耕牧或以懋遷地廣人稠洵稱富庶顧學校未設人材無自而成爰倣古黨序塾序之意立義學於衙署之後延師主講凡遠近之成人小子萃處而肄業焉惟濫而無節非所以示區別也今擬以生徒三十人為率其能識前言往行以蓄德者固將陶育以成國器即自幼學以至弱冠雖尚不曉文理而質性穎悟可習經書者皆在甄

收之列為此出示闔境人民知悉爾等有子弟願
讀書者即赴轅報名候本道示期擇取三十名將
姓名年歲籍貫注冊送館內受業毋許無故不到
其經此番報名或因額滿不錄者即令附名冊後
俟有空缺以次拔補至於文理明順之後諸生徒
中有志上進各廳回本籍州縣應試庶幾人材興
而風俗益臻醇厚是本道所厚望者也特示

按今世自各省會以至府廳州縣凡有學校之
地莫不建有書院以培養人材倚歟哉何風
之盛也至于義學之設或紳富樂善好施或鄉

村公議建立俾寒家小戶無力延師者之子弟
得就以資講習識之無地方人士自經理之守
土者不與聞焉歸化城學校未立因無書院自
前觀察德公設立義學五十餘年各官攤捐廉
俸合力延師名為義學實則與書院同每歲兩
學師脩脯所入亦與尋常州縣書院山長無少
區別口外無廩增附學每朔望講約輒以學師
兼之薪水微加滋潤亦所以廣教澤恤寒儒也
惟慮學師視講課為具文據學舍為己有支應
故事有名無實甚或藉衙齋出入為干預公事

之階靠官幕應酬為鑽營盤踞之地以致生徒
輩輕則廢業重則效尤旁觀為之齒冷遠近聞
而裹足風斯下矣更有鄙書官吏享萬鍾之粟
惜一勺之泉進擢推諉經年累月致寒士舌耕
筆耨曾不足供仰事俯蓄之需揆諸前賢創始
苦衷能無慙報今我

國家振興文教之會此地雖窮荒絕域亦斷不至頽
棄若斯然職在官師必當凜有則改之無則加
勉之訓且邊塞周圍數千里所恃以維持風化
者祇此一區倘得推而廣之於各廳胥則傲焉

將詩書絃誦之聲與犬吠雞鳴相聞而達乎四
境矣有心者尚共勛諸

古豐識畧卷十七

分巡歸綏等處兵備道長白鍾秀石帆

初稿

原 棟 選 知 縣 崞 縣 張 曾 小 袁

地部

教場

綏遠城教場 在城西門外每歲春秋二季八旗槍

箭前營官帶領兵丁操演槍陣兩箇月俟將軍閱看

畢停操演陣共用兵一千六百一十四名自二月

十五七月十五開操日起城上吹海螺十五日秋

季演放子母礮位在哈喇沁溝

歸化城土默特教場 在城北門外二里許內閱武
堂三間火藥庫二間看守兵住房二間照壁一堵
每年春秋二季土默特兵一千名各操演一箇月
操演時官兵齊集操演營同赴教場操演鳥槍兵
五百名弓箭兵五百名鳥槍兵演三進二連環斷
後兵出收隊官員與弓兵等演射箭把騎射弓兵
又裝盛鉛子演放槍牌三日自二月十五八月初
一開操日起城樓鳴海螺十五日

歸化綠營教場 在都司署側每年春秋二季大同
鎮總兵來營校閱都司以次將弁演習騎射兵丁

三百名操演鳥槍弓箭其平時操演都司主之

附槍字考

按槍七羊切周禮秋官職全國有大故而用金石則掌其令注用金石者作槍雷椎檠之屬疏槍雷椎檠皆字城捍禦之具古無鳥槍其言槍者指刀槍之槍而言蓋矛屬也然槍與雷並稱後世鳥槍亦當從之俗作鎗非鎗楚耕切在庚韻鼎類其音鎗者與鏘同為鏗鎗之鎗從未作軍器解或以鳥槍作鳥銃按銃充仲切音杭玉篇鑿也集韻斧穿也解亦

不同仍用槍字較近

附礮考

礮俗作砲潘安仁閒居賦礮石雷駭其礮字
之最先見者李注礮石今之拋石也說文無
礮字惟礮字注云建大木置石其上發機以
礮敵是許氏以礮為礮唐書李密傳以機發
石為攻城械號將軍礮自後人有火礮之製
俗遂從火作炮字更非火礮之用始見於宋
楊萬里海螭賦序云宋紹興三十一年金兵
欲濟江虞允文伏舟七寶山舟中發一霹靂

墜礮墜水中硫磺得水火自跳出紙裂而石
灰散為烟霞昧其人馬之目全兵大敗然此
乃紙礮用石灰以昧目非以礮子為攻擊之
具也礮之用鐵始于金名曰震天雷以火礮
攻城始于元世祖得回回所獻新礮以攻破
襄陽城名曰襄陽礮明永樂中平交趾始得
神機槍礮法至嘉靖二年佛郎機寇廣州指
揮柯榮禦之賊敗遁官軍獲其二舟得其礮
即名為佛郎機詳見明史紀又兵志云佛郎
機礮式以銅為之長五六尺重千餘斤小者

數百斤礮之用銅始見于此至我
朝天聰五年始造紅衣大礮名曰天竺助威大
將軍崇德八年又造神威大將軍礮康熙十
五年又造神威無敵大將軍礮康熙二十八
年又造武成永固大將軍礮詳見

皇朝禮器圖式

附海螺考


按古樂書無此名今營伍多用之即吹角之
義說文感恙人吹角也其聲悲栗故名感栗
史記樂書胡笳以感栗而無孔今海螺亦胡

茄之類惟古以竹為之今以螺殼為之耳

按操練之說莫詳於戚南塘紀效新書及練兵實紀其卷首或問諸條有切中今日操演之病者如或問祖宗自設官軍至今操練二百年矣比子之操一二年者孰為熟習且官軍亦有陣法教場隨時演習而臨事無裨實用何也曰譬如學生平日窗下講習的是五經四書解義策論一旦入場試官出來題目就是經書上的便可想望中式若平日雖是手不釋卷六讀些雜說詩詞作些傳奇歌賦一旦入場要作經義策

論中選所習非所用如何可得就是好學的也
徒然耳今之軍士設使平日所習所學的號令
技藝都是照臨陣的一般及至臨陣就以平日
所習者用之則操一日必有一日之功一件熟
便得一件之利況操練二百年自幼為兵士者
即奈今所習所學通是一箇虛套其臨陣的真
法真令真營真藝原無一字相合及其臨陣又
出一番新樣與平日耳目聞見迥然不同如此
就操一千年有何用處且如各色器技營陣殺
人的勾當豈是好看的如今教場閱兵俱要周

旋左右滿片花草便是好武藝但要整齊排列
進退從容便是好陣式花法勝而對手工夫漸
迷虛文張而真正營務不講戲局套數跳舞哄
人司閔者但取一時好看却一些實用不得諺
云到廝打時忘了拿架子此病最甚因識教場
之畧而附及之



古豐識畧卷十八

分巡歸綏等處兵備道長白鍾秀石帆

初稿

原揀選知縣崞縣張曾小袁

地部

倉庫

豐裕倉盈寧庫 在綏遠城為駐防官員兵丁俸餉
銀米及各廳錢糧監督稅課總出納地設立倉庫
大使一員專司其事額儲銀二十萬五千餘兩米
二萬三千餘石屬糧餉同知管理如額米不敷支
放隨時稟請採買

軍需倉 在歸化城內駝橋街內建久安盈恒充裕
六廩額儲穀五萬一千二百六十石係供支綏遠
城官兵口糧之需

常平倉 五廳皆有之歸化城設立在城外城隍廟
側內建蓋藏滿積聚豐六廩額儲穀三萬四百八
十石零係按豐歉平糶及借給農民之需

土默特倉 在歸化城內駝橋街內設隆字一廩儲
穀二千石係支放副都統衙門俸米並托里布拉
克台刺麻口糧及養濟院月米

土默特庫 在舊都統署大堂東偏內收存房地租

銀煤炭稅銀以備春秋祭祀將軍副都統廉俸官
學膏米及補修軍器操演公費繕書鋪司台站差
使工食並一切賞卹之用

義倉 在三賢廟內儲穀一千二百一十二石以備
凶荒賑濟

五廳錢糧稅課庫 俱在本署隨徵隨解無定額
托克托城倉 在城內雍正中建舊存放米石歸通
判管理今統歸豐裕倉

按常平等倉錢糧稅收等庫各廳州縣奉行既
久其弊不堪縷述綏遠城豐裕倉盈寧庫係為

駐防官兵而設其中收放銀米設有專官立法
至詳且盡惟近年來藩庫支絀領發未能以時
現復籌議減成辦理諸形掣肘識畧及此不過
稍存其目以俟後之君子於治人治法講求而
審定焉是則蒿目者所深幸也夫

古豐識畧卷十九

分巡歸綏等處兵備道長白鍾秀石帆

初稿

原 揀 選 知 縣 崞 縣 張 曾 小 袁

地部

田賦

歸化城 額徵大青山後廠地租銀一萬三千九百

四兩一錢四釐空閒廠地租銀一十六百四十八

兩三分二釐土默特租銀五百二十二兩六錢五

分額徵渾津黑河本色折色米四百八十八石二

斗四升六合九勺十五溝米三百三石五斗八升

六勺內有豪賴溝村於咸豐六年秋災案內詳報
冲毀地五頃五十五畝應開除米十六石四斗二
升八合實應徵米二百八十七石一斗三升二合
六勺

綏遠城同知 額徵渾津黑河莊頭米一千三百九
十二石九斗五升三合

和林格爾 額徵正黃等五旗廠地租銀一千六百
九兩四錢八分二釐內除咸豐四年詳報逃戶缺
額銀六百一十四兩五錢八分外實應徵銀九百
九十四兩九錢二釐土默特租銀五百四十六兩

六錢七分四釐額徵米五千五百九十七石五斗
一升八合一勺三抄

薩拉齊 額徵土默特租銀一千八百六十六兩一
錢一分額徵米三千七百七石一斗三升六合三
勺

清水河 額徵鑲藍旗地租銀二百四十五兩七
錢土默特租銀六十七兩五錢額徵米折正銀一
萬七千七百九十四兩二錢五分一釐內除二次
逃戶缺額銀七千四十七兩六錢九分六釐實應
徵銀一萬七百四十六兩五錢五分五釐

托克托城

額徵土默特租銀三百七兩二錢六分

額徵米三千一百一十七石九斗一升三合六勺

按催科之政寬嚴最難得中而口外六廳尤甚
漠南地方遼濶租戶俱自遠來歲收偶遇歉薄
輒捲席逃遁無籍貫可考無家屬親族可追與
土著居民編立戶口由近及遠都累都甲累甲
者迴別幸所種蒙古廠地租賦較他處頗輕且
徵收多係米石於納稼之日即就近輸將省以
米易銀之煩無米價銀價低昂短絀之弊額徵
間有不足守土者捐廉代輸尚易為力惟清水

河一廳前因路途遙遠駝運阻滯爾時想銀價亦低遂致米折正銀至一萬七千餘兩之多嗣因兩次逃戶缺額減去七千有奇現仍實徵銀一萬七百餘兩無論凶荒水旱即樂歲徵收亦斷難足額其催徵各官處分與府廳州縣正項錢糧同以致監司通判有督催之責者每屆參限輒罹譴斥本任數年來督同廳倅寬嚴交濟設法徵收催解幸已足數忽于今歲四月間因咸豐六年督催欠一分以上二參限滿部議降三級調用經撫憲續奏全完方得蒙 恩開復

雖其中銀數錯漏舛誤多端而推厥所由究因
非年清年款所致此後若不速行改易仍照舊
章將監司通判朝至而夕獲咎焉兩缺之設不
幾成畏途耶後至者當何以處之

古豐識畧卷二十

分巡歸綏等處兵備道長白鍾秀石帆

初稿

原揀選知縣崞縣張曾小袁

地部

市集

歸化城商賈向有十二行俗傳都統丹津由都中帶來其說無可考近則生聚蕃衍貨物具備百工咸集以行而計不啻千百數矣遇有公務則仍曰十二行其餘各以類附之總其大者而言也

十二行公舉鄉耆四人總領十二人經理庶務鄉耆

會館設立三賢廟遇有商賈詞訟事件輒諭令處
結各行公立條規俱由鄉耆等定議五廳暨各鎮
皆然推擇各行鋪長老成諳練者充之無鄉飲酒
禮文

歸化城行商坐賈相輔而行行商販買貨物至大青
山後諸部落及西域一帶貨賣易銀及牲畜以歸
有後山營路各生意名目乾隆四十二年准兵部
來咨歸化城前往烏魯木齊等處貿易商民俱由
副都統衙門發給照票將該商人數姓名及前往
貿易之部落札薩克旗分據該同知詳報到日填

註詳細照例給發等因嘉慶五年經署定邊左副
將軍齊登札布具奏歸化城商民於山後札薩克
旗下擁集過甚稽察紛繁且恐滋生事端嗣後請
發給照票方准貿易以便稽查等因蒙准由理藩
院咨行綏遠城將軍令將本院照票領去給發各
商民前往烏里雅素台等處及各蒙古地方持票
勒限貿易派員赴都請領俟商民貿易完竣依限
繳銷

歸化城商民至烏魯木齊等處謂之北套客其路乃
客賂蒙古人所開自歸化至迪化僅兩日程但無

旅店可宿行者須自携鍋帳耳見紀文達公烏魯
木齊雜詩注

行商貿易山後營路率於歲杪由城啟行至次年秋
冬間回城携帶牲畜等物在城貨賣

歸化城牲畜交易約有數處其馬市在綏遠城曰馬
橋駝市在副都統署前曰駝橋牛市在城北門外
曰牛橋羊市在北茶坊外曰羊橋其屠宰牲畜剝
取皮革就近硝熟分大小皮貨行交易在城南門
外十字街俗呼為皮十字

口外蒙古廠地寬濶人物繁庶糧粟糶糶較別務尤

急除各廳粟店行開設而外如歸化城之畢齊克
齊山後可以力更等村托克托城之河口薩拉
齊之包頭鎮等處皆米粟總滙居民就近糶賣

和薩清托各廳俱用足錢惟歸化城慣用短陌錢銀
價較他處獨昂錢數多寡不一居民多病之商賈
謂便於貿易

鈔票大錢鐵錢數年來廢置更端各處或用或否惟
口外數廳毗連外藩俱未暢行亦因民所利而利
之意守土者不能強也

口外粟店行錢行前有買空賣空諸弊每致高抬市

價居民受害頗深近俱嚴示禁止有犯者按賭博
例懲辦

按市不飾價孔子所以治魯市實不貳許行乃
以亂滕古者天子巡狩命市納價以觀民之好
惡即今開報市估之義周官司徒所掌有司市
賈師諸職市肆之所關重矣今市肆之設南人
曰虛北人曰集虛者因其散而言集者因其聚
而言其實同一意義口外界連各蒙古商販雲
集利之所在聞者趨之且商為四民之一日中
為市以有易無古聖王設教伊始即所必用惟

近今人情澆薄利盛義衰動輒有奸商把持等
弊夫商而目之曰奸其險惡不可言狀尚何足
與士農為伍惟願業此者善自營畫取什一之
利斗稱尺數出入公平無格外鑽求無負行罔
厭以正人心以厚風俗奉使者有深望也至行
使短錢諸習當逐漸更改以期畫一非朝夕所
能驟效爾

或問錢曰短陌始於何時按王伯厚困學紀
聞梁武帝時錢陌減始有足陌之名唐末以
八十為陌漢隱帝時王章又減三錢始有省

陌之名又顧寧人日知錄引隋書食貨志曰
梁大同後自破嶺以東錢以八十為陌名曰
東錢江鄧以上七十為百名曰西錢京師以
九十為陌名曰長錢中大同元帝乃詔通用
足陌詔下而人不從錢陌益少至於末年遂
以三十五為百唐憲宗元和中京師用錢每
貫頭除二十文穆宗長慶元年以所在用錢
塾陌不一勅内外公私給用錢宜每貫一例
除塾八十以九百二十文成貫至昭宗末京
師以八百五十為貫每陌纔八十五河南以

八十為陌漢隱帝時王章為三司使聚斂刻
急舊制錢出入皆以八十為陌章始令入者
八十出者七十七謂之省陌又抱朴子云取
人長錢還人短陌則短陌之說晉時已有之
不始於梁也